



La pèdra d'aua aunc pli schubra

Acziun da schubergiada da WWF Grischun al Glogn

DA GIUSEP VENZIN / ANR

■ **WWF numna en Svizra 64 pèdras custeivlas d'aua, el Grischun dudisch. Ina da quellas pèdras custeivlas ei il Glogn.** L'organisaziun che s'engascha en favur dil schurmetg digl ambient giavisch e s'engascha che quei resti aschia. Ella emprova d'impedir il diever dall'aua ella part sura dil Glogn. Quell'aua duess vegnir menada el lag da Zervreila per la produczium da forza electrica. Cun menar l'aua dil Glogn el Lag da Zervreila muncass quella oravontut ella part sut dil Glogn. «La munconza periclitass la regiun humida alla riva dil Glogn denter Uors e Glion. Nus sedustein en favur dil Glogn e sias rivas.» Quei ha Anita Wyss detg la sonda vargada a caschun dall'acziun da schubergiada. Ell'ei la menadra da project «Pèdras d'aua el Grischun» ed ha tgamunau l'acziun ensemen cun Beat Deplazes, il president da WWF Grischun ed anteriur vischin da Camuns. «Il Glogn ei da valeta extraordinaria. El ei ina dallas pli liungas pèdras d'aua el Grischun e duei era restar quei.» Igl atun vargau ha la collaboratura da WWF Grischun fatg ina spassegiada alla riva dil Glogn e constatau che la pèdra ei tscheu e leu tschuf-fergnada. «Jeu hai viu dabia restonzas da fier e schizun in entir carr.»

Spustau l'acziun

Muort la nevada avon diesch dis ha l'organisaziun dil schurmetg digl ambient spustau l'acziun sin la sonda vargada. «Culla neiv fuss la lavur alla riva stada memia prigulusa», ha Deplazes constatau. La sonda han ils nov voluntaris luvrau da cundiziuns emperneivlas. Sil tschancun

da bunamein sis kilometers denter Uors e la Cavorgia da Rein han els rimnau il rufid da tuttas sorts. Tier las stangas fier ed il carr han ils voluntaris rimnau dabia plastic. Quei ha plaschiu meins alla collaboratura da WWF. «Il fier ei ecologicamein meins problematic. Il plastic ei denton ina catastrofa pigl ambient.» Wyss ha supplicau da plazzar in appel. «Spassegiaders alla riva da flums duein rimnar plastic – era sche quei ei buca lur rufid. Els fan quei en favur digl ambient.»

In pescadur passiuau

In dils voluntaris – amitgs da WWF, indigens e pescadurs – era Seppli Derungs da Camuns. «Jeu mon bia a pesca al Glogn. Pli baul sulet leu – ussa meinsvart el Rein da Glion tochen Trun.» Cura che Deplazes ha dumandau Derungs per agid ha quel buca schau supplicar duas ga. «Igl ei secapescha aunc pli bi alla riva

dil Glogn senza il rufid», ha il pescadur passiuau detg. El Glogn peglia el litgivas, mo quei drovi meinsvart cletg. «Pli baul cu nus astgavan pescar mo dus ni treis dis ad jamna el Glogn eri meglier.»

Regiun humida periclitada

WWF numna la Greina, il Glogn e la Val Sumvitg ina pèdra d'aua. Quei munta per l'organisaziun dil schurmetg digl ambient sinonim per il schurmetg digl ambient en Svizra. El cudisch «Pèdras d'aua» edius da WWF e cumparius dacuort sedamondan ils auturs Martin Arnold ed Urs Fitze sch'il clom dalla Greina hagi aunc adina sia valeta. «Il cumbat per la Greina ei ditg anavos. Defenda nossa tiarra vinavon quei territori da muntogna unic?» En quei senn sedosta WWF encounter il diever d'aua dalla part sura dil Glogn. Las regiuns humidass denter Uors e Glion seigien periclitadas. Cun menar l'aua al Lag da Zervreila maunchi a quels territoris tont'aua per onn sco il volumen dil Lag da Pfäffikon. Quel ei dus kilometers e miez liungas, 1,3 km lads ed ella media 18,5 meters aults.



Ils voluntaris han tratg in pulit mantun fier ord il Glogn. Anita Wyss (tiarza da seniester) meina il project «Pèdras d'aua». Beat Deplazes (tierz da dretg) presidiescha l'organisaziun WWF Grischun.

FOTO G. VENZIN